

Griffie ER Bonaire	
Ingek.:	JUN 29 2020
Vrjnummer:	2020002329
Griffier:	Uitv.:

Na: Sra den Heyer
Diputado di Salu i Sosial Entidat Públiko Boneiru
Presente

Kralendijk, 29 yùni 2020

Apresiabel sra. Diputado,

Boneiru meskos ku Aruba i Kòrsou a sinti efekto di e krisis polítiko ekonómiko na Venezuela, desde un tempu ta andando. Hopi Venezolano a bandoná nan pais dor di miedu pa persekushon polítiko òf pa un mihó por venerá.

Segun informashonnan ku nos ta dispone di dje, na Venezuela tin un eskases di remedi, kuminda, kuido i siguridat sosial ku a kondusi salida di un gran kantidat di Venezolano ultimo anjanan for di nan Pais. Sifranan di e plataforma R4V (Plataforma pa Kordinashon di refugiadonan i imigrantenan di Venezuela), Sifranan di plataforma UNHCR (Nashonnan Uni su agensia di Refugiado) ta mostra ku mas of menos 5.1 miyon Venezolano ta bibando pafo di Venezuela, di kual mas of menos 34.500 ta bibando riba e Islanan Aruba, Boneiru i Korsow; 16.500 na Korsou, 17.000 na Aruba i mas o menos 1000 na Boneiru según AdviesComissie voor Vreemdelingen Zaken (ACVZ 2019). No ta tur indokumentado ta refugiado, tin ta biba tambe pa hopi tempu kaba riba e islanan, tambe tin indokumentado di otro nashonalidatnan.

Personanan indokumenta ta drenta Boneiru prinsipalmente komo turista of ku un permit pa traha i establese pa un periodo defini, pero ta keda riba e Isla indokumenta, ora e periodo vense.

Konsiderando e krisis migratorio alarmante aki i sabiendo ku Boneiru tambe lo keda konfronta kualkier momentu ku un situashon humanitario di urgensia, frakshon di UPB a presenta un moshon den e Konseho Insular dia 26 di februari 2019, ku a keda akseptá unanamente, pa urgi gobièrnu pa kuminsa prepara un introdukshon di ayudo humanitario pa indokumentadonan konforme e pakto di Marakesh.

Frakshon di UPB a keda informá ku personanan indokumenta òf ku a pidi asilo i nan petishon ta den proseso aki na Boneiru, ta desampará i sin ningun atenshon di gobièrnu.

Nan no ta risibí ningun ayudo humanitario di RCN, ni tampoko di nos gobièrnu. Nan no tin seguro médiko, nan no tin pèrmit pa traha i tampoko ta bini na remarke pa ayudo sosial. Hopi ta biba den un situashon di pobresa i ku hopi huntu den un kas, bibando bou di tenshon ku hopi miedu pa keda detené i deportá.

Pa por sobreviví e personanan aki ta trahando ilegal prinsipalmente den konstrukshon, prosititushon, limpieza domestiko, ta eksperensia abuso laboral i tin bes hasta ta keda someté na trafikashon di hende.

Tambe nos ta na altura ku e úniko maneho migratorio ku Gobièrnu Hulandes ta apliká riba Boneiru ta detenshon y deportashon ora ta trata di personanan indokumenta. E krisis di Covid 19 ku Boneiru ta pasando aden a afektá tambe e indokumentadonan i a hasi nan situashon sosial/finansiero muchu mas kompliká i delikado. Hopi a pèrdè trabou i ta pasando den ekstremo pobreza. Dor ku Venezuela su frontera ta será, nan no por risibí remedinan i esnan ku malesanan króniko i/òf contagioso ku tabata risibí remedinan di Venezuela ta kore riesgo pa bira malu i kontagiá otronan den nos komunidad.

Frakshon di UPB ta hopi preokupa pa e echo ku dia 1 di juli proksimo frontera aerio lo habri i tardi of tempran Covid 19 lo drenta Boneiru. Si un persona indokumenta keda infektá ku Covid 19, esaki por ekspande hopi rapido i por hasi nos salu publiko aun mas vulnerabel.

Nos frakshon ta na altura ku aki na Boneiru e organisashon Caritas riba su propio forsa, ta dunando ayudo humanitario na personanan indokumentá i pobernan ku ta den nesesidat. Según Caritas petishonnan pa ayudo di indokumentadonan i tambe esnan pover a subi drastikamente durante e krisis di Covid 19.

Hasiendo uso di artikulo 46 di Reglamentu di Òrdu (kontesta bokal), mi kier a hasi sra. diputado e siguiente preguntanan:

1. Diputado ta na altura kuantu indokumentado tin aki na Boneiru?
2. Diputado por informá Konseho Insular kon e situashon sosial di e indokumentadonan ta na Boneiru? Diputado tin un bista ki impakto nan a sufri ku e krisis di Covid19 i kon nan ta sobreviviendo?
3. Frakshon di UPB ta na altura ku gobièrnu no ta dunando ningun ayudo humanitario na personanan sin dokumentashon. Diputado por splika e motibu pa esaki? Diputado ta na altura ki konsekuensia esaki por tin pa salu públiko di Boneiru? i kiko ta plan di gobièrnu tokante esaki den un futuro serkano?
4. Diputado ta na altura di e maneho migratorio ku Gobièrnu Hulandes ta apliká aki na Boneiru? Diputado ta haña e maneho migratorio aki transparente pa protekshon di indokumentado i refugiadonan?
5. Gobièrnu di Boneiru ta di akuerdo ku e maneho di Hulanda pa ku indokumentado i refugiadonan ariba menshoná?
6. Diputado konosé e tratado di derecho humano i e tratado pa refugiadonan ku paisnan den Reino mester kumpli kuné?
7. Diputado ta na altura di e moshon di dia 26 di Febrüari 2019 tokante Pakto di Marakesh di Nashonnan Uni ku a keda unánimemente akseptá den Konseho Insular? Diputado por informá Konseho Insular si e Gobièrnu aktual ta dispuesto pa implementá esaki te kon leu bo ta permití?

8. Gobiernu tin un maneho pa migrantenan? Si e kontesta ta si, diputado por splika e kontenido di esaki?
9. Awor ku frontera ta bai habri gobièrnu tin un plan kon pa atendé ku indokumentadonan si nan keda infektá pa Covid 19?
10. Diputado por informá Konseho Insular si Mariadall i Direktorado Komunitat i Kuido ta prepará si surgi un ekspanshon di Covid 19 bou di e indokumentadonan? Ken ta para responsabel pa e gastunan relashoná ku esaki?
11. Diputado konosé e organisashon ku ta duna ayudo Humanitario strukturalmente na Indokumentadonan i pobernan aki na Boneiru ku yama Caritas Bonaire?
12. Diputado ta di akuerdo ku den e krisis di Covid 19 aki e organisashon so lo no por karga tur responsabilidad pa kuido di salu públiko di Boneiru i ayudo humanitario i ku nan mester di algun sosten?

Sperando un kontesta vokal den nos próksimo reunion di konseho insular mi ta terminá.

Atentamente,



Doktora Eshter Bernabela miembro di Konseho Insular